

OPOJNE DROGE I PREKURSORI

Opojna droga i psihotropna tvar je svaka tvar prirodnog ili vještačkog porijekla koja je uvrštena u popis opojnih droga u skladu sa međunarodnim konvencijama o nadzoru nad opojnim drogama ili na temelju odluke nadležnog tijela u Bosni i Hercegovini.

Biljka iz koje se može dobiti opojna droga je svaka biljka iz koje se može dobiti opojna droga a koja je uvrštena u popis tih biljaka u skladu sa međunarodnim konvencijama o nadzoru nad opojnim drogama ili na temelju odluke nadležnog tijela u Bosni i Hercegovini, kao i dio takve biljke koji se može upotrebiti za dobijanje opojne droge.

Prekursor je svaka prirodna ili vještačka tvar koja se može upotrebiti u izradi opojne droge i koja je uvrštena u popis prekursora u skladu sa međunarodnim konvencijama o nadzoru nad opojnim drogama ili na osnovu odluke nadležnog tijela u Bosni i Hercegovini.

Tvari su opojne droge, psihotropne tvari i prekursori uvršteni u popis opojnih droga, psihotropnih tvari i prekursora u skladu sa međunarodnim konvencijama o nadzoru nad opojnim drogama ili na osnovu odluke nadležnog tijela u Bosni i Hercegovini.

Pripravak je otopina ili smjesa, u čvrstom ili tekućem stanju ili u bilo kojem fizičkom obliku, koja sadrži opojnu drogu, psihotropnu tvar ili biljku iz koje se može dobiti opojna droga.

Promet je svaki način puštanja u promet opojne droge, psihotropne tvari, biljke, dijela biljke ili prekursora, kao što su: **uvoz, izvoz, provoz**, prevoz, nabavka, kupovina, prodaja, zamjena, prenos, skladištenje, izdavanje na recept i slično.

1. PROPISI

- [Zakon o sprečavanju i suzbijanju zloupotrebe opojnih droga \("Sl. glasnik BiH" , broj 08/06\)](#)
- [Popis opojnih droga, psihotropnih supstanci, biljaka iz kojih se može dobiti opojna droga i prekursora \("Sl.glasnik BiH", broj 08/06\)](#)
- Odluka o određivanju međunarodnih graničnih prelaza za prekogranični promet supstanci i biljaka iz tabele II, III i IV popisa opojnih droga, psihotropnih supstanci, biljaka iz kojih se može dobiti opojna droga i prekursora ("Sl.glasnik BiH", broj 58/07; 55/15)
- [Odluka o dopuni liste opojnih droga, psihotropnih tvari, biljaka iz kojih se može dobiti opojna droga i prekursora \("Sl.glasnik BiH", broj 103/08\)](#)
- [Odluka o izuzimanja preparata od primjene kontrolnih mjera \("Sl.glasnik BiH", broj 20/10\)](#)

2. ZAKON O SPREČAVANJU I SUZBIJANJU ZLOUPOTREBE OPOJNIH DROGA

Ovim se Zakonom propisuje: osnivanje posebnih tijela za suzbijanje zloupotrebe opojnih droga, razvrstavanje tvari i biljaka kao opojnih droga, psihotropnih tvari, biljaka iz kojih se može dobiti opojna droga ili kao prekursora, prema režimu zabrane ili nadzora koji se na njih primjenjuje te prema njihovoj vrsti i svojstvima, svrha i uslovi dopuštenog uzgoja biljaka iz kojih se mogu dobiti opojne droge, te uslovi za izradu, **promet** i posjedovanje opojne droge,

psihotropnih tvari, biljaka iz kojih se mogu dobiti opojne droge i prekursora, nadzor nad uzgojem biljaka iz kojih se mogu dobiti opojna droga te nad izradom, **prometom** i posjedovanjem opojne droge, psihotropnih tvari, biljake iz koje se mogu dobiti opojne droge i prekursori, okvirne mjere za suzbijanje zloupotrebe opojnih droga.

Izrada, **promet** i posjedovanje prekursora dopušteni su pod uslovima propisanim ovim Zakonom.

Zabranjeno je direktno ili indirektno oglašavanje proizvodnje, **prometa**, posjedovanja i upotrebe opojnih droga i psihotropnih tvari te promocija opojnih droga i psihotropnih tvari na bilo koji drugi način, osim u naučnim i stručnim izdanjima namijenjenima naučnim radnicima ili stručnjacima u oblasti zdravstva.

Opojne droge, psihotropne tvari, biljke iz kojih se može dobiti opojna droga i prekursori te njihovi pripravci u Popisu se razvrstavaju u tablice I., II., III. i IV., zavisno o nadzornim mjerama koje se na njih primjenjuju.

- a) Tablica I. - Zabranjene tvari i biljke;
- b) Tablica II. - Tvari i biljke pod strogim nadzorom;
- c) Tablica III. - Tvari i biljke pod nadzorom;
- d) Prekursori se razvrstavaju u Tablicu IV;

[Popis opojnih droga, psihotropnih supstanci, biljaka iz kojih se može dobiti opojna droga i prekursora \("Sl.glasnik BiH", broj 08/06\)](#)

OPOJNE DROGE, PSIHOTROPNE TVARI, BILJKE IZ KOJIH SE MOŽE DOBITI OPOJNA DROGA

Uzgoj, proizvodnja, **promet**, posjedovanje i upotreba tvari i biljaka razvrstanih u Tablicu I. te njihovih pripravaka zabranjeni su, osim u svrhe medicinskog ili naučnog istraživanja ili u sudskomedicinske ili nastavne svrhe ili u policijske svrhe, za šta je potrebna posebna dozvola Agencije za lijekove i medicinska sredstva BiH.

Dozvola za bavljenje proizvodnjom i **prometom** tvari i biljaka razvrstanih u Tablice II. i III. može se izdati u medicinske, veterinarske ili u naučne svrhe.

U dozvoli se posebno navodi svaka djelatnost za koju je pravna osoba ovlaštena, svrha obavljanja djelatnosti i svaka tvar i biljka razvrstana u Tablice II. i III. koju je pravna osoba ovlaštena koristiti za te djelatnosti.

Samo pravnim osobama koje imaju dozvolu za izradu i **promet** tvari i biljaka razvrstanih u Tablice II. i III. dopušteno je obavljati **uvoz, izvoz i provoz** tvari i biljaka razvrstanih u tablice II. i III. te njihovih pripravaka.

Za svaki uvoz i izvoz tvari i biljka iz Tablice II. i III. potrebna je posebna dozvola koju izdaje Agencija za lijekove i medicinska sredstva BiH.

Dozvola za uvoz, izvoz ili provoz je neprenosiva.

Dozvola za uvoz, izvoz ili provoz sadrži svoj rok važenja.

Izuzetno, uvozna dozvola nije potrebna u slučaju prirodne ili druge katastrofe ili hitnosti. U tim slučajevima, uvoz može hitno odobriti rukovodilac Agencije za lijekove i medicinska sredstva BiH ili ministar civilnih poslova Bosne i Hercegovine.

Osobe koje prelaze državnu granicu smiju posjedovati lijek koji sadrži psihotropnu tvar razvrstanu u Tablice II. i III. samo na temelju medicinske dokumentacije, u količini nužnoj za ličnu upotrebu u trajanju najviše do sedam dana.

Osobe koje su na supstitucionalnoj terapiji bolesti ovisnosti ili simptomatskoj terapiji u terminalnoj fazi malignih bolesti prilikom prelaska državne granice izuzetno smiju posjedovati lijek koji sadrži tvar razvrstanu u Tablice II. ili III. na temelju medicinske dokumentacije i u količini nužnoj za ličnu upotrebu u trajanju najviše do 15 dana.

Naziv i količinu lijeka uz predočenje medicinske dokumentacije, osoba je dužna prijaviti carinskom službeniku prilikom prelaska državne granice.

PREKURSORI

Prekursore mogu izrađivati, puštati u **promet** i posjedovati pravne i fizičke osobe koje su registrovane za bavljenje tom djelatnošću i koje za obavljanje te djelatnosti ispunjavaju posebne uslove propisane ovim Zakonom i drugim propisima te imaju dozvolu **Ministarstva spoljne trgovine i ekonomskih odnosa**.

U dozvoli se posebno navodi svaka djelatnost za koju je pravna ili fizička osoba ovlaštena, svrha obavljanja djelatnosti i svaki prekursor koji je pravna ili fizička osoba ovlaštena koristiti za te djelatnosti.

Prekursore mogu uvoziti, izvoziti i provoziti pravne i fizičke osobe koje su tehnički opremljene i registrovane za obavljanje te djelatnosti i koje imaju dozvolu za uvoz, izvoz ili provoz koju izdaje Ministarstvo spoljne trgovine i ekonomskih odnosa BiH.

Prekursore koji su lijekovi ili otrovi mogu uvoziti, izvoziti i provoziti pravne i fizičke osobe koje su tehnički opremljene i registrovane za promet lijekova ili otrova i koje za obavljanje te djelatnosti imaju dozvolu Agencije za lijekove i medicinska sredstva BiH.

Dozvola za uvoz, izvoz ili provoz prekursora može se izdati za određenu pošiljku (pojedinačna dozvola) ili za određenu vrstu i količinu tvari u određenom razdoblju (grupna dozvola).

Dozvolu za uvoz, izvoz ili provoz prekursora iz Tablice IV. izdaje Ministarstvo spoljne trgovine i ekonomskih odnosa BiH.

Dozvolu za uvoz, izvoz ili provoz prekursora koji su lijekovi ili otrovi izdaje Agencija za lijekove i medicinska sredstva BiH.

3. NADLEŽNOST CARINE

Tvari i biljke razvrstane u tablice II., III. i IV. dopušteno je uvoziti i izvoziti samo preko posebno za tu svrhu određenih graničnih prelaza i carinskih ispostava a prema **Odluci o određivanju međunarodnih graničnih prelaza za prekogranični promet supstanci i**

biljaka iz tablice II, III i IV popisa opojnih droga, psihotropnih supstanci, biljaka iz kojih se može dobiti opojna droga i prekursora.

U uvoznjoj se dozvoli posebno navodi treba li se uvoz izvršiti samo u jednoj jedinstvenoj pošiljci ili se može izvršiti u više od jedne pošiljke.

Izvozna dozvola mora sadržavati i broj i datum uvozne dozvole zemlje uvoza, potvrđujući i da je uvoz dopušten.

Primjerak ili ovjerena kopija izvozne dozvole zemlje izvoznice mora se priložiti svakoj pošiljci, a tijelo koje je dozvolu izdalo mora poslati kopiju državi uvoza.

Kada pošiljka uđe na teritoriju Bosne i Hercegovine ili kada istekne rok uvozne dozvole, carinska ispostava će kopiju izvozne dozvole zemlje izvoznice, uz priloženu ispravu u kojoj su navedene količine svake tvari, biljke ili pripravka koji su stvarno uvezeni za tvari i biljke sa popisa II. i III. dostaviti Agenciji za lijekove i medicinska sredstva BiH a tvari sa popisa IV. Ministarstvu spoljne trgovine i ekonomskih odnosa BiH.

Ako je količina tvari, biljke ili pripravka koja je zaista uvezena manja nego što je navedeno u izvoznjoj dozvoli zemlje izvoznice, carinska ispostava će o tome sačiniti službenu zabilješku na dozvoli i na svim ovjerenim kopijama te na carinskoj ispravi.

Zabranjen je uvoz i izvoz iz Bosne i Hercegovine pošiljki tvari i biljaka razvrstanih u tablice II., III. i IV. te njihovih pripravaka preko poštanskog pretinca ili banke na račun stranke različite od stranke koja je navedena u izvoznjoj dozvoli.

Zabranjen je uvoz u Bosnu i Hercegovinu pošiljki tvari i biljaka razvrstanih u tablice II., III. i IV. te njihovih pripravaka u zatvoreno skladište, osim ako Ministarstvo spoljne trgovine i ekonomskih odnosa BiH, uz prethodno mišljenje Agencije za lijekove i medicinska sredstva BiH, ne potvrdi na uvoznjoj dozvoli da odobrava takvu pošiljku.

Zabranjen je izvoz iz Bosne i Hercegovine pošiljki tvari i biljaka razvrstanih u tablice II., III. i IV. te njihovih pripravaka u zatvoreno skladište, osim ako država uvoza ne potvrdi na uvoznjoj dozvoli da je dopustila takvu pošiljku.

Carinski organ je dužna na dozvoli za uvoz, izvoz ili provoz tvari ili biljaka zabilježiti datum i mjesto carinjenja te ime osobe koja je obavila carinjenje.

Primjerak ili kopiju dozvole carinska ispostava je dužna dostaviti tijelu koje je dozvolu izdalo i Odjelu za opojne droge, Ministarstva bezbjednosti BiH u roku od osam dana od dana carinjenja.

U slučaju provoza tvari ili biljaka carinski organ je dužan za svaku pošiljku utvrditi vrstu i količinu tvari, biljke ili njihovih pripravaka, na carinskoj ispravi zabilježiti iz koje države pošiljka dolazi i u koju je državu upućena i odmah o pošiljci obavijestiti Odjel za opojne droge, Ministarstva bezbjednosti BiH.

4. KONTAKT

Za detaljnije informacije u vezi vanjskotrgovinskog prometa opojnih droga i prekursora iz Popisa II., III. i IV. možete se obratiti Glavnoj kancelariji UIO, Sektor za carine, Odsjek za kontrolu.